

Naqqiut

Akissuteqaat 23-09-2021-meersaq taarserpaa

(Makku naqqiutigineqarput: Oqaatsitigut naqqiutit kiisalu imm. nr. naqqinneqarpoq)

Kalaallit Nunaata kangiani Tasiilami nunaqarfiinilu, kiisalu Ittoqqortoormiini aalisarnikkut ikaarsaariartornermi qanoq inuussutissarsiornikkut siuarsaasinnaanissaq pillugu apeqquteqaat aallaavigalugu oqallisissiaq.

(Inatsisartunut ilaasortaq Emanuel Nûko Naleraq)

Akissuteqaat

(Aalisarnermut Piniarnermullu Naalakkersuisoq)

Apeqquteqaat aallaavigalugu oqallinnissamik soqutigintartumut siunnersuuteqartoq Emanuel Nûko, Naleraq, Naalakkersuisut sinnerlugit qutsavigaara.

Kalaallit Nunaat tamakkerlugu aamma Tunumi inuussutissarsiutitigut ineriartortoqarnissaa tamatta soqutigisaraarput. Innuttaasut amerlanerusut imminnut pilersorsinnaatillugit inuiaqatigiinnullu tunniussaqaartillugit inuiaqatigiit nukittunerusut atugarissaarnerusullu pilersis-savagut. Taamaattumik immikkut pisariaqaartitsisunut Tunu ilanngullugu sumiiffinni inuussutissarsiutit ineriartortinneqarnissaannut tapiissutinik qinnuteqarnissamut periarfissanik arlalinnik Naalakkersuisut periarfissaqaartitsipput.

Aalisarnermut tunngasuni aalisarnermik inuussutissarsiutip ineriartortinnissaanut immikkut tapiiffigineqarnissamut periarfissat arlaqarput. Aalisarnerup ineriartortinneqarnissaanut aningaasaliissutit immikkoortitat angallammik anginerusumik pisinermut tapiissutigineqartarput. Taarsigassarsiat erniaqanngitsut taarsersugassaannngitsullu, aningaasat immikkoortinneqartut umiatsiaaqqanut tapiissutigineqartarput, kiisalu aallarteqqinnissamut tapiiffigineqarsinnaanermut periarfissaqarluni. Kiisalu aningaasanut inatsimmi kontoqarpoq 50.01.20, tassani ilaatigut isorliunerusunut Tunu ilanngullugu inuussutissarsiutinut tapiissutinut tunngatillugu immikkut malittarisassaqarluni.

50.01.20-mut tunngatillugu Tunu, Qaanaaq Qimusseriarsuarlu immikkut soqutigalugit 2020-imi 2021-milu immikkut 1 million kr.-inik Inatsisartut immikkoortitsipput. Kuummiuni tunitsivimmu innaallagissap aqqutaanut ikkuffia pitsaanerulersinniarlugu Nukissiorfinnut 2020-imi millionit tamakkerlugit tunniunneqarput. Taamaaliortoqarpoq tunitsiviup qerititsi-nermut piginnaasaata annertunerulersinnissaanut periarfissaq qulakkeerniarlugu. Tunumi aalisarnerup ineriartortinneqarnissaanut suliniutinut sisamanut 2021-imi katillugit 650.333 kr.-init tapiissutit tunniunneqarput, taakkununga ilaapput bundgarnersornermut ilinniartitsineq, bundgarnersornermut atortunut tapiissuteqarneq, Tasiilamut Ittoqqortoormiunullu ningittak-kanik atortut ilanngullugit misileraalluni aalisarnermut tapiissuteqarneq, aamma Tunumi aalisarneq pillugu isumasioqatigiinnermut, ukiaq manna ingerlanneqartumut aalisarnermut soqutigisaqartunit peqataaffigineqartumut.

Aalisartunut piniartunullu inuussutissarsiutaannik ineriartortitsinermit atatillugu Aalisartunut Piniartunullu Siunnersuisoqarfik siunnersuisussaasoq pikkorissartitsisussaasorlu Naalakkersuisut aamma tapersersorpaat. Tamatuma saniatigut Aalisarnerup ineriartortinneqarnissaanut aningaasaliissutit immikkoortitat aqutugalugit angallatinik atortunillu pisinermut kiisalu angallateqarnerup nutarterneranut atatillugu angallatinik pisoqqanik isaterinermit tapiissutinik periarfissaqarpoq. Ukiuni 2016 – 2021 umiatsiaaqqanut qinnuteqaatit 39-t tiguneqarput umiatsiaaqqallu aqqaneq marluk pisiarineqaramik akiata 84%-a angullugu tapiissuteqarfigineqarput, tamannalu ilaatigut Tunumut immikkut iluaqusiivoq.

Kangerlunni imartatsinnilu aalisagaqassusianik misissuinerit annertusinerisigut aalisagaatitta amerlassusaat pillugit ilisimasagut annertunerulersittariaqarivut ataatsimut isigalugu Naalakkersuisut kissaatigaat. Taamaaliortoqassaaq piujuartitsinerup ineriartornera aamma siunissami kinguaariit isumalluutitsinnik pingaarutilinnik atuisinnaanerat qulakkeerniarlugu. Naalakkersuisut Tunumi aalisarnissamut periarfissat pillugit annerusumik ilisimasanik pissarsiniarlutik Tunumi misileraalluni aalisarnermik ukiuni 2014 - 2021 pilersitsipput, aalisagaqatigiinnik assigiinngitsunik soorlu qaleralinnik, saarullinnik saattuanillu angallatit aalisarsinnaangortillugit. Misileraalluni aalisarnerit takutippaat Tunumi aalisarnerulersinnaaneq periarfissatut ilimanaateqartoq aamma sinerissap qanittuani aalisarnermut pisassiissutinik aalajangersaasoqarsimangimmat aalisartut killilerneqarnatik aalisarsinnaapput.

Tamatuma saniatigut Namminersorlutik Oqartussanit aamma kommuneqarfik Sermersuumit peqataaffigineqartumik Tunumi ineriartortitsinermit periarfissat pillugit inuussutissarsiutit arlallit akimorlugit suliniutinik ineriartortitsinermik suliaqartumik Naalakkersuisut suleqatigiissitamik pilersitsipput.

Taamaalilluni suliniutinik ilorraap tungaanut sammisumik aallartitsisoqarpoq. Tunumi aalisarnermit amerlanerusut ikaarsaartinniarlugit suliniutit allat aallartinneqartussat suugaluar-pataluunniit pingaaruteqarpoq pissutsit piviusut akuerinissaat piffissamillu atuinissaat akue-ralugu. Pisariitsunik sukkasuunillu aaqqiissutissaqanngilaq. Tamaviaaruttariaqarpoq aaqqiis-sutit isumaqatigiissutigineqartut inuussutissarsiortut, kommuni Namminersorlutillu Oqartussat qanimut suleqatigalugit aatsaat siuarsarneqarsinnaammata. Taamaattumik aalisarnermut ikaar-sarnerup tapersersornissaanut salleraanissartik innuttaasut inuussutissarsiortullu akuerisa-riaqarmassuk pingaaruteqarpoq. Innuttaasut aalisarnermut ikaarsaarnissamik kissaateqarpata imaluunniit tunitsivinnik aallartitsiniarpata kommunimit Namminersorlutillu Oqartussanit tapersersorneqarnissaat periarfissagissaarpoq kisianni tassunga inuit suliniuteqarnissaanik pisariaqartitsivoq.

Tunumi aalisarnermut piviusumik ikaarsarnermik aallartitsineq iluatsissagutsigu taava inunnit aalisarnermut ikaarsarusuttunit aamma ingerlatseqatigiiffinnit Tunumi aalisarnerup ineriartortinnissaanik periarfissatut ilimanaateqartutut isiginnittunit ingerlanneqartariaqarpoq.

Naalakkersuisuniit taamatut oqaaseqarluta Inatsisartut oqallinnissaat qilanaaarput.